

# Powšitkowne WOZJEWJENJA

njedźelu, 1. nowembra 2020

## Wusyłanje Božeje mšě live

Serbskorěčnu Božu mšu móža wěriwi tutu njedźelu, 1. nowembra, na swjedženju Wšěch swjatyh, znowa jako livestream w interneće scěhować. Dopoldnja w 9 hodź. přenjeso so wona z Chróšćanskeje cyrkwy. Jeli měta so přichodnu njedźelu, 8. nowembra, tohorunja Boža mša w serbskej rěči live wusyłać, budže k tomu kaž nětkole na internetowej stronje [www.posol.de](http://www.posol.de) link na nju podaty.

## Njedźelne kemše w Radworskej wosadze

Božej mši na swjedženju Wšěch swjatyh njedźelu, 1. nowembra, budžetej Radworju w 9.00 hodź. a w 10.30 hodź. K wopomnjeću Chudych dušow, póndźelu, 2. nowembra, budže Boža mša w Radworskej farskej cyrkwi we 18.30 hodź. W Zdžeri kemše njesu. Žohnowanje rowow 1. nowembra w Radworju a 2. nowembra w Zdžeri njebudže, ale so pozdžišo nachwata. Cyrkej w Radworju je wodnjo stajnje k wosobinskemu modlenju wotewrjena.

## Njedźelne kemše w Ralbičanskej wosadze

W Ralbicach budže Boža mša na swjedženju Wšěch swjatyh njedźelu, 1. nowembra, w 10.30 hodź. Nyšpor budže w 14 hodź. W Róžeńće su Bože služby po zwučenym porjedze w 9 hodź. (serbsce) a w 10.30 hodź. (němsce). a w 14 hodź. nyšpor. Boža mša k wopomnjeću Chudych dušow a požohnowanjom rowow njebudže póndźelu, 2. nowembra, ale pozdžišo. W Rakecach njedźelu, 1. nowembra, kemše njebudu. Cyrkwi w Ralbicach a Róžeńće stej wšědnje wodnjo stajnje k wosobinskemu modlenju wotewrjenej.

## TCM podpěra dušepastyrski projekt fararja dr. Dzikiewicza

Dary za Pólsku hromadza so hakle klětu

Towarstwo Cyrila a Metoda z.t. (TCM) chce ze swojej akciju „Łužica pomha“ tónkróć projekt fararja dr. Daniela Dzikiewicza, kotryž je dobre džewjeć lět w Chróšćicach skutkował, finančielnje při twarje wosadnicy we Wojdatach podpěrać. Tu trjeba wón, zo by w swojej wosadze z mnohimi młodymi swójbami – lětsa mějachu 80 přenjowoprawjenskich džěci a runje telko křćeńcow – porjadnje pastoralnje skutkować móhl. Wobšěrnje je projekt w Katolskim Posole 25. oktobra wopisany. Pjenježne dary móža so na konto Cyrill-Methodius-Verein e.V., IBAN: DE 65 750 90 300 000 828 23 66, pod hesłom „Litawska“ přepokazać. Štóź sej darowanju kwitowanku přeje, měł swoju dospołnu adresu zdžělić.

Předsyda TCM Jurij Špitank skedźbnja na to, zo towarstwo w akciji „Łužica pomha“ koronoweje krizy dla lětsa nazymu za Pólsku dary njehromadzi kaž je wone to zašle lěta činiło. Dalokož móžno, ma so to klětu nalěto nachwatać.

## Seminar k přihotěj na mandźelstwo njebudže nazymu

Seminar k přihotěj na sakrament mandźelstwa, kotryž měješe so pjatk a sobotu, 27. a 28. nowembra, w Smochčanskim kubłanišću swjateho Bena wotměć, dyrbi so aktualneho položnja dla přestorčić. Nowy termin so sčasom wozjewi. Tole bu hakle po redakciskim kóncu Katolskeho Posoła rozsudžene, w kotrymž so za seminar hišće wabi.

## Serbske kemše w Drježdžanach

Drježdžanscy Serbja su na maćernorěčnu Božu mšu njedźelu, 8. nowembra, w 16.00 hodź. do cyrkwy swjateho Antonija w Drježdžanach-Löbtauwje, Bünauska hasa 10, přeprošeni. Kemše změje po dotalnym planje farar Gabriš Nawka z Kulowa.

## Dalši serbski žarowanski kruh

Žarowanskaj přewodźerjej Regina Krawcowa ze Smječek a Tomaš Pěčka ze Sernjan poskićataj znowa serbski žarowanski kruh. Prěnje zetkanje budže štwórtk, 5. nowembra, w 17.00 hodź. w Chróšćanskej putniskej hospodze. Zajimcy měli so pola hospicneje služby w Kamjencu pod telefonowym čisłom (0 35 78) 37 43 12 abo pola Reginy Krawcoweje pod čisłom (01 74) 7 01 94 87 přizjewić.

## Wo česćowanju swjateho Bosćana informuja nětko w Budyšinje

Wustajeńcu wo česćowanju swjateho Bosćana w Chróšćanskej wosadze móža sej zajimcy hač do njedźele, 8. nowembra, w Budyskej tachantskej cyrkwi wobhladać. Přístupna je wona za čas wotewrjenja simultaneje cyrkwy wot pónđzele do soboty wot 10 do 16 hodź. a njedźelu wot 12 do 16 hodź.

## Knižna premjera: „Nowa swoboda?“

Na knižnu premjeru knihy „Nowa swoboda? – Dopomnički na přewrót 1989/90“ přeprošujej Budyske Ludowe nakładnistwo Domowina a podst. Kamjentny dom. Wona ma so pónđzeli, 9. nowembra, w 19.00 hodź. w kamjentnym domie z knižnej premjeru, podijowej diskusiju, čitanjom a hudźbu wotměć. Wobmjezowanym městnow dla měli so zajimcy hač do srjedy, 4. nowembra, přizjewić, a to w Smolerjec kniharni pod telefonowym čisłom (0 35 91) 57 72 88 abo z mailku na buchhandlung@domowina-verlag.de. Na knižnej premjerje budže so serbski žurnalist Roman Nuk z awtorcu Cordulu Ratajczakowej a z časowymi swědkami Rejzu Šěnowej, Benediktom Rjedu a Měrkom Brankačkom rozmołwjeć. Wujimki z knihi budže Hanka Rjelcyna čitać. Zastup je darmotny. Kniha budže so přeni króć na knižnej premjerje předawać.

## Kubłanski personal w Radworju trěbny

Katolski serbski džěćacy dom Alojs Andricki w Radworju pyta kubłarku abo kublarja za městno dotalneje kubłarki, kotraž poda so na wuměnk. Městno ma so 1. decembra wobsadzić. Štóz ma zajim abo prašenja, njech so na wjednicu Andreju Henichowu pod telefonowym čisłom (03 59 35) 2 07 17 abo z mailku andritzki.kinderhaus@t-online.de wobroći.

## Swobodne džěłowe městno w starowni

Dom swjateje Ludmile w Chróšćicach poskića wot 1. januara 2021 džěłowe městno dohladowanja wobydlerjow. Městno ma so z 20 hodźinami wob tydžeń wobsadzić. Přizjewić smě so kóždy, kiž so rady ze staršimi ludźimi zaběra. Nadrobniše informacije poda wjednistwo domu pod telefonowym čisłom (03 57 96) 9 47 30.

## Maćična akademija wotprajena

Dale trajaceje pandemije dla su přichodne přednoški Maćičneje akademije, kiž bychu so po zwučenym wašnju zašlych lět wot nowembra hač do měrca w Budyskim hosćencu „Wjelbik“ wotměli, wotprajene. Po normalizowanju wobstejnosćow maja so zarjadowanja nachwatać, zdžěli stawizniska sekcija Maćicy Serbskeje.